

Headlines

1. लेफ्टिनेंट गवर्नर मनोज सिन्हा होरें आखेआ ऐ जे एनसीसी, युवाएं दी सोच गी नमां आकार दिंदे होई बड़े मानै कन्नै समाज ते राष्ट्र दी सेवा करै करदी ऐ।
2. एलजी सिन्हा होर, औंदी 2 जुलाई गी श्री अमरनाथ जी दी जात्तरा दे पैहले जत्थे गी जम्मू थमां कश्मीर घाटी लेई रवाना करडन। इस सलाना जात्तरा लेई सब्बै बंदोबस्त मुकम्म कीते जा'रदे ना।
3. जम्मू दे डिवीजनल कमिशनर ते आईजीपी होरें जम्मू संभाग दे बक्ख-बक्ख जिलें थमां चलने आहली लौटकी-बड्डी धार्मिक यात्राएं लेई कीते गेदे बंदोबस्तें दा जायजा लैता।
4. उधमपुर जिले दे बसंतगढ़ इलाके च मजूद जैशे मोहम्मद गुट दे 3 पाकिस्तानी आतंकवादिएं दे सफाये लेई सुरक्षाबलें आसेआ बड्डे स्तरै पर तपाशी अभियान चलाया जा'रदा ऐ।
5. पहलगाम च सैलानिं पर हमला करने आहले आतंकवादिएं गी मदाद देने दे दोषिं गी अज्ज एनआईए दी बशेश अदालतै अगगे पेश कीता गेआ।

<><><><><><>

LG NCC

लेफ्टिनेंट गवर्नर मनोज सिन्हा होरें युवाएं दी सोच गी नमां आकार दिंदे होई बड़े मानै कन्नै समाज ते राष्ट्र दी सेवा करने लेई नेशनल कैडेट कोर - एनसीसी दी सराहना कीती ऐ। श्रीनगर च आयोजित इक बशेश राष्ट्री एकता शिविर दरान बोलदे होई एलजी सिन्हा होरें जबरदस्त दलेरी, अनुशासन, नेतृत्व ते समाजी प्रगति लेई वचनबद्धता गितै एनसीसी दे कैडेटें दी सिफ्त कीती। एलजी होरें आखेआ जे एहू शिविर मुल्ल भरै दे नौजवानें लेई इक ऐसा अनोखा मंच ऐ जेह्दे राहें ओहू जम्मू-कश्मीर दी सगोसार संस्कृति ते परंपराएं दा अनुभव करदे होई अनेकता च एकता दी भावना दा प्रदर्शन बी करा'रदे ना।

<><><><><><>

Amarnath Yatra

श्री अमरनाथ जी की सालाना जात्रा अगले हफ्ते थमां शुरू होआ करदी ऐ। जम्मू थमां श्रद्धालुएं दे पैहले जत्थे गी 2 जुलाई गी कश्मीर घाटी लेई रवाना कीता जाहगा। जम्मू दे डिवीजनल कमिशनर रमेश कुमार होरें इस गल्लै की तसदीक कीती ऐ जे जात्रा गी सुरक्षित ते बवस्थित ढंगै सिर करोआने लेई सबै बंदोबस्त करी कीते जा रदे ना। लेफ्टिनेंट गवर्नर मनोज सिन्हा, भगवती नगर आहले आधारित शिविर थमां 2 जुलाई गी श्रद्धालुएं दे जत्थे गी घाटी लेई रवाना करडन। 52एं दिनें की श्री अमरनाथ जी की जात्रा, ऐगती 3 जुलाई थमां शुरू होआ करदी ऐ ते एहू 9 अगस्त गी रक्खड़पुत्रेआ आहले दिन संपन्न होई जाहगा।

<><><><><><>

Ramban-SANJY

3 जुलाई थमां शुरू होआरदी श्री अमरनाथ जी की सालाना जात्रा दे महेनजर तैयारियां जोरें-शोरें कन्नै जारी ना। रामबन जिले च बी जात्रा की पच्छौक्कड़ै च सबै प्रबंधें गी मुकदा रूप दित्ता जारदा ऐ। जिला प्रशासन रामबन, सुरक्षा, आपदा प्रबंधन, रौहने-बौहने दे बंदोबस्त, स्वच्छता ते सेहत दिक्खभाल जेही जरूरी सेवाएं पर मुख् करी ध्यान केंद्रित करा'रदा ऐ। एहदे अलावा मेडिकल स्थलतां उपलब्ध करोआने लेई बक्ख-बक्ख मेडिकल टीमें ते एम्बुलेंसें गी तैनात कीता जा'रदा ऐ ते सब्बनें सेहत संस्थानें गी हर स्थिति च कम्म करने लेई निर्देश बी जारी कीते गेदे ना। तोआई, रामबन दे चीफ मेडिकल आफिसर डॉ. कमल जी जद्दू होरें श्री अमरनाथ जी की जात्रा लेई सेहत सरबन्धी तैयारियें की बी समीक्षा कीती।

<><><><><><>

Div Com IGP Pilgrimage

जम्मू दे डिवीजनल कमिशनर रमेश कुमार ते आईजीपी भीम सेन टूटी होरें जम्मू संभाग दे बक्ख-बक्ख जिलें थमां चलने आहली लौहकी-बड्डी धार्मिक जात्राएं गी सुरक्षित ते बवस्थित ढंगै सिर करोआने लेई कीते गेदे बंदोबस्तें दा अज्ज जायजा लैता। इ'नें दौनें आला अधिकारिएं, सुरक्षा सरबन्धी हीलें, भीड़ दे प्रबंधन ते मेडिकल सुविधाएं की समीक्षा कीती। धार्मिक जात्राएं

दरान कानून बवस्था बनाई रक्खने लेई पुलस ते प्रशासन आसेआ आपसी तालमेल कन्नै सारी तैयारिएं गी जकीनी बनाने पर ध्यान केन्द्रित कीता जारदा ऐ।

<><><><><><>

Dharti Aaba

जम्मू दे बसनीक धरती आबा जनजातीय ग्राम उत्कर्ष अभियान दे तैहत 15एं दिनें दा जागरूकता अभियान आस्तै आभार प्रकट करा'रदे ना। एहू अभियान इसलै पूरे जिले च चलाया जारदा ऐ। एहू पैहल जिला प्रशासन आसेआ शुरू कीती गई ही ते महत्वपूर्ण सरकारी योजनाएं ते सेवाएं दे बारे च जागरूकता बढ़ाने दे मकसद कन्नै 6 ब्लॉकें च 16 पंचायतें च आयोजित कीती जा रदी ऐ। जिला मजिस्ट्रेट दे दफ्तर नै जानकारी दिती ऐ जे अभियान च लोकें दी बड़ी मती गिनतरी दिक्खने गी लब्बी ते उनें इस पैहल दे राहें पुज्ज बढ़ाने दे जत्ते दी तरीफ कीती ऐ। इस मुहिम दा मकसद जनजातीय अबादी कन्नै सिद्धे तौरा पर जुड़ियै प्रभावी अखीरी मील तगर पुज्ज यकीनी बनाना ते शासन च पारदर्शिता गी बढ़ावा देना शामिल ऐ।

<><><><><><>

Udh Operation

उधमपुर जिले दे बसंतगढ़ इलाके च मजदू जैशे मोहम्मद गुट दे 3 पाकिस्तानी आतंकवादिएं दे सफाये लेई सुरक्षाबलें आसेआ बड्डे स्तरै पर तपाशी अभियान चलाया जा'रदा ऐ। फौज ते पुलस आसेआ सांझे तौर पर चलाया गेदा अभियान अज्ज बड्डलै फही शुरू करी दिता गेआ। आतंकवादिएं दा पता लाने लेई ड्रोन ते खोजी कुत्तें दी मदाद बी लैती जा'रदी ऐ। साढ़े जिला संवाददाता मूजब, कल टाक्करे दरान मारे गेदे इक आतंकवादी दी शिनाख्त पाकिस्तान दे बसनीक हैदर उर्फ मौलवी दे तौर पर कीती गई ऐ।

<><><><><><>

NIA-Court

हाल च गै पहलगाम आतंकवादी हमले दे मामले च जुड़े दे आतंकवादियें गी कथित तौरा पर पनाह देने दे आरोप च गिरफ्तार कीते गेदे परवेज अहमद ते बशीर अहमद गी उंदी रिमांड बदाने दी गुजारश करने आस्तै अज्ज जम्मू च एन.आई.ए मामले दी विशेष अदालत दे अगगे पेश कीता गेआ, कीजे एन.आई.ए दे तैहत उंदी पिछली पंज दिनें दी रिमांड अज्ज खत्म होई गई ही। एहू जानकारी स्हाढे जिला संवाददाता अंकुश शर्मा होरें दिती ऐ।

<><><><><><>

Rath-Yatra

दुनिया भरै च मशहूर उड़ीसा दे पुरी दी भगवान जगन्नाथ जी हुंदी सलाना रि जात्तरा अज्ज शुरू होने दे कन्नै गै जम्मू च बी धार्मिक उत्साह कन्नै जात्तरा दे उपलक्ष्य गी मनाया गेआ ते इस मौके पर रथ जात्तरा बी कडुी गई। सांबा च बी श्रद्धालु श्री जगन्नाथ भगवान हुंदी शानदार रथ जात्तरा च शामिल होए। धार्मिक जुलूस बुडवानी दे श्री जगन्नाथ मंदर थमां शुरू होआ ते सांबा दे बक्ख-बक्ख बजारें च होइयै व्यारा मंदर दे परिसर च खत्म होआ।

<><><><><><>

PIB Media Workshop

किश्तवाड़ दे डीसी दफ्तरै च अज्ज ग्रामीण मीडिया कार्यशाला दा सरिस्ता कीता गेआ। खरी मती गिनतरी च मीडिया कर्मिं इस कार्यक्रमै च हिस्सा लैता। पीआईबी जम्मू दिं डरैक्टर नेहा जलाली, डिप्टी कमिशनर पंकज शर्मा ते एडीसी पवन कोतवाल होर बी इस मौके पर उत्थे मजूद हे।

<><><><><><>